



Siverth K. Heilmann

UPA 2023/164

Atassut

18. April 2023

**Ilumut Danmarkimiit avissaarniarneq inuup inuuneraniit naleqarnerusutut isigineqassanersoq apeqquaqaat aallaavigalugu oqallisissiaq.**

(Inatsisartuni ilaasortaq Aqqalu C. Jerimiassen, Atassut)

Oqallissarisooq isumaqatigingaarpara oqarmat nuna innuttaasoqanngippat pinngortitaannaasoq kusanartorsuaq. Nunammi innuttaasuni namminiilertissinnaanngilai, inuumuna nammineerneq nammineq ingerlakkaa.

Nammineerneq qulaaniit tunniussaangilaq, namminermiuna pilersitassaq. Politikkeriniinnaanngitsoq, innuttaasuniilli tamanit imminnut napatinnermikkut. Siunnersuuteqartorlu isumaqatigingaarpara oqarmat ukiorpassuarni oqallinneq paatsooqatigiissutaajuarsimanerarmagu. Ilaasa aappi naamiluunniit eqqartoraat, ilaasa qanoq anguneqassanersoq eqqartoraat, ilaasalu innuttaasut oqallisigigaat.

Uani ersarissumik apeqqutigineqartoq tassaavoq, inuup inuunera immaqaluunniit dk-miit avissaarniarneq sorleq pingaartinneruniarneripput. Ullumikkummi ukiorpassuarni avissaarniapiloornerup takussutissartaraa nakorsiarnissattaluunniit katsorsartinnissarlunniit ilungersunangaarnera. Qassissaamita aamma tusarparput nakorsiartuaraluarlutik angerlartitaaginnarsimallutik toqusut.

Atassummiit naalagaaffinngornissaq ajoriffissaqartinngilarput, tassungami pigutta tapersersuilluta taaseqataassaqaarpugut. Avissaarnissarli imminik isumaqartinngilarput innuttaasut tunullunneqassappata. Taamaammat Inatsisartut tamassi apererusuppassi minnerpaamilluunniit inuup peqqissuunissaa, nakorsiarsinnaanissaalu suleqatigiissutigisinnaaneripput. Inummi peqqisooq immiut napatissinnaavoq, innuttaasullu imminnut napatittut nunartik aningaasaqarnikkut kivissavaat, taassumalu kingorna Naalagaaffinngortitsillutik.

Illuliorniaruttami pujoorfik aallartissutiginaviannngilarput. Toqqavissaa naammasseqqaartariaqarparput. Tassa piviusooq.

Aajuna Atassummiit akissut ersarissooq, qaqugumulluunniit inuk qitiutittuassavarput. Uangattaq uumatillunga tamanna anguniartuassavara.